

欽定大清會典事例

卷

一千零三十一至
一千零三十三

都察院
五城

欽定大清會典事例卷一千三十一

都察院

五城

巡城職掌

司坊分理

巡城職掌。○順治三年奏准。天下諸司入京朝覲。部院科道考察賢否。誠恐有鑽營屬託。拜謁當道。交通賄賂。不肖官僚。巧生機變。假稱接風為名。大張筵席。及無藉棍徒。串通京棍。肆行詐索。少有不遂。徧布匿名揭帖。設謀陷害者。由五城御史督令司坊官員。時加訪緝。違者題叅。○十年議准。令五城御史各率所屬。辦理地方之

事。釐剔姦弊。整頓風俗。○十三年覆准。

京師城內鬪毆錢債等細事。如原告被告皆旗人。則送部審理。如與民互告。仍聽五城審結。○十六年題准。

京師內外十六門。令巡城御史不時巡查。○又題准。五城滿洲漢軍御史。遇常朝齋戒。俱隨各旗班次之內。嗣後凡遇常朝齋戒之期。俱隨都察院各官一同上。

朝齋戒。○十七年題准。城外居民地方。有侵占搭蓋。並街中立牌。難以行走。通行拆卸。如違該城

題叅治罪。○十八年題准。緝捕盜賊。審理人命。盤獲逃人。及禁約賭博。稽查姦宄。邪教謠言。煽惑人心。惡棍衙蠹。指官嚇詐。姦徒惡官。潛住地方。聚夥燒香。並僧道寺院坊店等項事務。責令巡城御史通行嚴飭。○又定。在城捕盜官兵人等。遇有地方殺人劫財事件。不行用心緝捕。聽巡城御史指實題叅。○康熙十一年題准。五城詞訟。御史徑行審結。徒罪以上送刑部。○二十七年議准。城外居住旗人。有在城控告者。笞杖以下事件。該城御史審理歸結。○又議准。凡有

姦宄聚衆結黨。設阱流毒者。五城御史不時緝訪。重則題叅。輕則懲處。○二十九年議准。凡軍流人犯。有祖父母父母告稱老疾無倚。家無以次成丁者。令掌印兵馬司出結。該御史確查轉送。○雍正八年

諭。嗣後內外大小文武官員帽頂補服坐褥等項。悉照本身現任品級。不得指稱加級。以開僭越之端。在京著有稽察之責者。嚴行稽查。在外著該管上司稽查。儻仍復不遵。除將本人議處外。其失察之員。一併處分。○乾隆八年議准。

天壇南北兩廊內圍牆外居住者。租賃貿易。弛往來懋遷之禁。惟禁游蕩酣飲之徒。以及腥羶酒脯垂帘列肆者。仍令該城御史及司坊各官不時巡察。儻有藉端生事。立行查拏。○二十七年

諭諸徐孫條奏七品以下官生帽頂不遵定制。概用素金。請嗣後編檢知縣等官。改用蜜蠟頂一摺。所奏原為慎重等級起見。但從前議定頂式。分別銜品。著在儀章。差等本為詳備。今因官生等妄意希榮假借。乃不先懲其違制之咎。而轉欲紛更品目。增出蜜蠟一項。則事涉煩瑣。可不必行。但內外督撫部臣。俱應留

心查察。即需次京城。未登仕版各員。亦有步軍統領及五城御史衙門。可以時為稽察。嗣後僅有故違成式。戴用混淆。不分金銀花素。如該御史所奏者。即行斥革治罪。以重名器。三十一年奏准。嗣後五城一切案卷。務須存儲公所。滿漢御史均應每日進署理事。民間呈詞。公同接收辦理。或遇昏夜緊急事件。始准在私宅接收。次日會辦。僅仍前每月進署數次。以致公務稽延。或更有將檔案私存書吏家中之事。即行叅處。三十一年議准。嗣後五城等衙門審理案件。悉遵向定成例辦

理遇有詞訟內所控情節。介在疑似。及關繫罪名出入。非笞杖所能完結者。量其情節輕重。或奏或咨。俱交刑部審明。按擬不得率行自結。如有將例應送部之案。不行送部者。即將承辦官員。交部照例議處。○嘉慶五年

諭給事中邱庭澍奏嚴禁僭用帽頂一摺。據稱每月驗看月選官。及新捐分發試用人員。八九品及未入流各官。俱僭用七品金頂。又近見街市各色人等。纓帽上俱用紅絨結頂。並有棍徒等假冒官職。戴用金頂。均請嚴禁等語。所奏甚是。此弊由來已久。朕在藩邸

曾經目睹。國家設官分職等威。本自秩然。冠服儀章。豈容稍有僭越。會典所載甚明。乃近日八九品及未入流人員。往往僭戴七品素金頂。並有無職人員。隨意戴用者。此等陋習。向有聞見。該給事中奏請嚴禁。甚為得當。嗣後八九品及未入流帽頂。俱謹遵會典分別戴用。其補服亦應按照定例。毋許稍有僭越。京城內外著交步軍統領及五城御史各部院衙門著交堂官。各省著交督撫。留心查察。勒限更換。違者立即叅奏。至外間民人涼暖帽上俱用纓絨大結。尤屬非是。並著一體飭查。嚴行禁止。俾章服得有等差。官

聯益昭整肅。其游手棍徒及逃匪等。有假充職官戴用金頂者。亦照該給事中所奏。實力嚴拏。毋使宵小弊混。○九年

諭給事中汪鏞奏現在五城御史坐城之期。大率五日一次。覈計每月辦事止有六日。殊覺過疏等語。所奏是。各衙門堂官。朕節經降旨。諭令於每日到署辦公。以期事無曠廢。乃近來不但巡城御史有坐城之期。即京堂除六部外。其餘各衙門。亦俱設有堂期名目。每隔三五日始一進署。以致案牘壓積。豈勤勉辦公之道。嗣後巡城御史。除另有他事。准其閒日到署。其

無事日期俱著常川到署辦事。至九卿各衙門。非遇直日奏事之期。均應按日進署。毋許再有堂期名目。以重職守而儆怠惰。○十五年。

飭令五城御史。遇有應緝案犯。須嚴定限期。責成捕役。上緊捕獲。懈玩者重懲。○又

飭令五城御史。於開張錢鋪者。必令五家互出保結。遇有關鋪潛逃之事。令保結之家照票分賠。其換出錢文。除照向例錢市與鋪家准各扣底四文外。如有任意短少。許換錢之人扭稟地方官隨時究治。○又奏准嗣後陸續開張錢鋪。如無互

保及保結不全者。俱不准開設外。其從前舊有各鋪。多至三百五十餘家。俱免其取保。期無擾累。仍不時督率司坊官分投查察。不許各鋪多出錢票。以防拐逃。○十九年

諭外城市廛稠密。易於藏姦。著五城御史督率司坊官一體查緝。以期肅清輦轂。綏靖民居。毋得日久生懈。

○又

飭令五城御史所派捕役。止令緝犯送官審訊。不得私刑拷掠。勒取供詞。○二十年。

飭令五城御史嚴密訪拏訟師。凡城外會館廟宇俱認

真稽察。以免藏匿。○二十二年。

飭令五城御史。凡有飭緝要犯。須上緊嚴拏。不在禁令者。毋得妄拏株累。○又

飭令五城御史。於各城門偷運米石出城者。隨地查拏究辦。並重懲包庇縱放情弊。○又

飭令五城御史。嚴拏盜賊窩主。並重懲硬拉居民牲畜勒錢回贖。及胥役包庇等弊。○道光元年

諭士民挾優醵飲。耗竭資財。曠廢職業。因此導侈長惡。不可不嚴行飭禁。嗣後有徵逐歌場。招搖侈肆者。隨時嚴拏懲辦。以杜奢靡而端習尚。○又

飭令五城御史嚴拏城外把棍會匪等犯其未犯案者
即行驅逐毋任容留。又

飭令五城御史認真訪拏不法匪徒不得以現獲一二
匪犯塞責仍復疏縱。二年

諭御史許乃濟奏近來五城地方報竊之案每年獲案
不過十之二三且有命盜重犯日久逋誅者五城司
坊額設捕役工食甚微其承緝時購覓眼線每多需
費該捕役等餬口不敷或秦賊養姦或畏法求退皆
因有懲無勸遂致捕務無從整頓著照所請交戶部
都察院會同覈議籌撥部庫銀兩發典生息每年所

得息銀酌給捕務較繁之西北兩城賞需銀各四五
百兩。捕務稍簡之中東南三城賞需銀各三四百兩。
視獲案之多少定賞賚之重輕。即責成巡城御史覈
實支用。年終造冊報銷。毋許浮冒。仍以一半息銀歸
還部款。如此後查有該捕役秦賊延案者。即重治其
罪。庶幾知所勸懲。可期輦轂肅清矣。欽此遵

旨議准。部庫閒款內撥銀三萬兩。發交殷實典商。按月
一分生息。每年應得息銀三千六百兩。遇閏加
增三百兩。以二千兩為緝捕經費。交五城御史
衙門備賞。所餘銀兩。按年解交部庫歸還原款。

統俟歸完之日。將原撥銀三萬兩內提回一萬三千兩。餘銀一萬七千兩。照舊生息。以資五城賞賚。並令該御史覈實支用。按季造冊報部備覈。仍於年終將一年賞用細數彙報都察院。造具總冊咨部覈銷。僅有餘贍。存儲各城。作為次歲賞需用。其每年賞需銀二千兩。酌給捕務較繁之西北兩城各五百兩。酌給捕務較簡之中東南三城各三百三十三兩零。並將各典商姓名分領銀數及起息日期。分析報部。以備稽覈。又議定緝捕賞賚章程。凡奉

特旨緝拏要犯。迅速拏獲者。按事之輕重。臨時分別從優酌賞。至本城准刑部審明緝獲正兇之案。於六箇月內拏獲者。賞銀五十兩。本城盜案迅速拏獲首犯。審實。法無可貸者。賞銀五十兩。情有可原者。賞銀三十兩。本城積年承緝命盜案。拏獲要犯。審實。法無可貸者。賞銀四十兩。情有可原者。賞銀二十兩。本城贓物重大竊案。拏獲要犯。審實。按罪名之重輕。賞銀三十兩。或二十兩。如係協同拏獲者。不在賞內。本城尋常竊盜。計贓在十兩以上。迅速拏獲者。賞銀十兩。拏獲